

Cart De'en Bzoj San Pabən' Par Titon'

Pabən' chzoje' Titon'

1 Nada' Pab naca' beṇə' güen xšin Diozən' na' naca' apostol che Jesocristən'. Diozən' gwleje' nada' niḥ chyixjui'a xtiže' enə' len beṇə' ca' bagwleje' par əsa'aque' xi'ine', par niḥ so'onlilaže' ene' na' se'ejni'ine' de'en naquə de'e li na' par niḥ so'one' can' chene'e Diozən'. ²Na' chaquəlenga'aca'ane' par niḥ yesə'əneze' de que žjəsyə'ənite'e len Diozən' zejlicəne. Ze'e xe yežlyon' Diozən' bene' lyebe de que beṇə' so'onlilaže' le' žjəsyə'ənite'e len le' zejlicəne. Na' nezecho de que bito chonlažə' Diozən'. ³Na' na'a catə' bžin ža bžin or can' bžie' bia'anə', Diozən' ben' babebej chio'o xni'a de'e malən' bzejni'ine' chio'o dižə' güen dižə' cobə che'enə'. Na' gwleje' nada' na' bene' mendad chixjui'an len beṇə' yoblə. ⁴Chzoja' le' Tito, len' naco' ca doalje xi'ina' chedə' bzejni'ida' le' par niḥ chonlilažo'o Xancho Jesocristən' can' chonlilaža'ane' nada'. Chona' orasyon lao Xacho Diozən' na' lao Xancho Jesocristən' ben' babebej chio'o xni'a de'e malən', chṇaba' əsa'aclenšgue' le' na' yesyə'əyašə' yesyə'əži'ilaže'e

le' na' so'onšgue' par niḥ so cuezo' binlo len xbab de'en yo'o lo'o yichjla'ažda'ogo'onə'.

Xšin Diozən' de'en chon Titon' gan' nzi' Creta

⁵Bocua'ana' le' Cretan' par niḥ yeyož gono' xšin Diozən' de'en gwzolaogua' beṇə'. Na' lecə beṇə' mendad cuejo' beṇə' yoso'ogüia yoso'oye' yeziquə'əchlə beṇə' chso'onlilaže' Jesocristən' to to yež. ⁶⁻⁷Šə no beṇə' chso'on ca notono əṇa chso'one' de'e malən', šə nitə' tgüejzə no'ol chega'aque', na' šə xi'inga'aque' ca' chso'onlilaže'e Jesocristən' na' šə xi'inga'aque' ca' bito chso'onditjeine' mech par so'one' legr na' nic zjənaque' beṇə' godenag, ca beṇə' can' cuejo' par yoso'ogüia yoso'oye' yeziquə'əchlə beṇə' chso'onlilaže' Jesocristən'. Gwlej beṇə' so'on ca notono əṇa chso'one' de'e malən', chedə' la' xšin Dioz na'anə' so'one'. Bito cuejo' beṇə' zjənaquə godenag, beṇə' loc, beṇə' güe'e zo, o beṇə' chso'on znia par yoso'ozenag beṇə' chega'aque', na' nic cuejo' beṇə' zjəzelažə' so'one' gan mech len xšin Diozən' de'en so'one'enə'. ⁸Gwlej beṇə' chəsyə'əbeine' choso'ogüialaogüe'

benə' yoblə ližga'aque'enə' na' benə' chəsyə'əbei de'e güennə' lgu'a' de'e malən', benə' chəsə'ənabia' cuinga'aque' par chso'one' can' chazlažə' Diozən', na' benə' chso'on güen len ljuežjga'aque', na' benə' chso'on can' chebei Diozən', na' benə' cui chso'e latjə n̄abia' la'ažda'omalga'aque'enə' lega'aque'. ⁹Benə' ca' yoso'ogüia yoso'oye' yeziquə'əchlə benə' chso'onlilažə' Cristən', cheyałə' n̄itə'ətezə n̄ite'e yoso'ozenague' che dižə' lin' de'en chsed chlo'icho che Jesocristən' la' naquən de'e güen. Šə yoso'ozenague' chei, gaquə yoso'ozejni'ine'en benə' ca' chəsə'əne contr, na' gacbia' de que benə' contr ca' chso'e dižə'ən clelə.

¹⁰Gwlej benə' ca' chso'on can' bagwni'anə' par yoso'ogüia yoso'oye' yeziquə'əchlə benə' chso'onlilažə' Cristən' chedə' nitə' zan benə' Izrael na' bałə benə' cui zjənaquə benə' Izrael chso'one' txen len chio'o chonlilažə'əcho Jesocristən', pero bito chse'enenə' n̄abia' Diozən' lega'aque'. Chso'echgüe' dižə' de'en bitobi zjəzaquə' na' chəsə'əxoayague' benə'. ¹¹Cheyałə' gono' par niçh benə' ca' chso'on ca' Cretan' n̄ite'e žizə cuich yoso'osed yoso'olo'ine' dižə' güenlažə'əna' chedə' chso'one' par niçh zan family bito nite'e binl̄o len ljuežjga'aque'. Na' parzə niçh so'one' gan mechən' choso'osed choso'olo'ine' de'e ca' cui cheyałə' yoso'osed yoso'olo'ine'.

¹²To profet chega'aque' leczə benə' Creta bzoje' chega'aque' gwne': "Benə' Creta ca' syempr zjənaque' benə' güenlažə' na'

gwxaquə'əlebəga'aque' ca bia znia yelə' güen de'e mal chega'aque'enə', na' leczə zjənaque' benə' lia na' benə' xagüed." ¹³De'en bzoje' chega'aque' naquən de'e li. De'e na'anə' cheyałə' til̄o' lega'aque' che de'e malən' chso'one' par niçh yesə'ədalene' dižə' güen che Jesocristən'. ¹⁴Na' til̄əga'aco'one' par niçh cui yoso'ozenague' che dižə' güenlažə' de'en chsa'aljlažə' benə' Izrael ca', na' cui yoso'ozenague' che benə' ca' bagosə'əbejyichje' de'en naquə de'e li bitə'ətezə de'e əse'e lega'aque' so'one'.

¹⁵Benə' ca' zjənaque' benə' la'aždao' xi'ilažə' guaquə sa'ogüe' bitə'ətezə yelə' guao sin cui so'onən manch yichjla'ažda'oga'aque'enə'. Pero na' benə' ca' cui chso'onlilažə' Jesocristən' bitə'ətezə de'e so'one', yichjla'aždaoga'aque'enə' zjənaquəchguan manch lao Diozən'. Choso'ozenagteze' che la'ažda'omalga'aque'enə' na' bitobi chsa'aque' catə'ən chso'one' de'e malən'. ¹⁶Chəsə'əne' de que zjənombi'e Diozən' pero laogüe de'en chso'ontezə chso'one' de'e malən' nacbia' de que bito zjənombi'ene'. Chso'one' de'en chgue'i Diozən'. Na' zjənaque' benə' godenag, na' bito chac so'one' bitə'ətezə de'en naquə güen.

De'e güen de'en chsed chlo'icho che Jesocristən'

2 Pero na' le' Tito, bsd blo'i porzə de'en chonən txen len de'en chsed chlo'ida' che Jesocristən', la' naquən de'e güen. ²Ben mēdad de que benə'

byo gol ca' cui so'e latjə n̄abia'
 la'ažda'omalga'aque'enə' lega'aque'.
 Cheyalə' so'one' par niçh beṇə'
 yoblə əsa'apəga'aque'ne' respet, na'
 cheyalə' yesə'anabia' cuinga'aque'
 par so'one' can' chazlažə' Diozən'.
 Cheyalə' yesə'adalene' dižə' güen
 çhe Jesocristən', cheyalə' n̄itə'ətezə
 n̄ite'e əsa'aque'ne' çhe l̄juežjga'aque',
 na' cheyalə' n̄itə'ətezə n̄ite'e
 so'onlilažə'e Diozən' catə' chesə'əyi'
 chesə'əzaque'e. ³Na' leczə ca'
 ben mendad de que no'olə gol ca'
 n̄itə'ətezə n̄ite'e so'elaogü'e Diozən'
 bitə'ətezə de'e so'one'. Na' ben
 mendad cui yoso'ožia yoso'onite'e
 beṇə' na' bito əsa'aque' beṇə' gü'e
 zo. Cheyalə' yoso'osed yoso'olo'ine'
 beṇə' bin' naquə de'e güen so'one'.
⁴Cheyalə' yoso'osed yoso'olo'ine'
 no'olə xcuidə' ca' can' cheyalə'
 yesə'əži'ililažə'e be'en çhega'aque'
 na' xi'in çhega'aque' ca'. ⁵Na' leczə
 no'olə gol ca' cheyalə' yoso'osed
 yoso'olo'ine' no'olə xcuidə' ca' can'
 yesə'anabia' cuinga'aque' par so'one'
 can' chazlažə' Diozən', na' can'
 cheyalə' so'one' par niçh gactezə
 gaquə yichjla'ažda'oga'aque'enə'
 xi'ililažə', na' can' cheyalə'
 yoso'ogüia yoso'oye' ližga'aque'enə'
 na' so'on xšinga'aque'. Yoso'osed
 yoso'olo'ine' lega'aque' can' cheyalə'
 so'one' güen len yoguə'əlol beṇə'
 na' can' cheyalə' yoso'ozenague'
 çhe be'en çhega'aque'. No'olə gol
 ca' cheyalə' yoso'osed yoso'olo'ine'
 no'olə xcuidə' ca' can' so'one' par
 niçh bito yesə'əne beṇə' contr xtižə'
 Diozən'.

⁶Na' leczə ca' cheyalə' əneyoido'
 beṇə' xcuidə' ca' par niçh
 yesə'anabia' cuinga'aque' par

so'one' can' chazlažə' Diozən'. ⁷Na'
 bitə'ətezə de'e gono' le', gono'on
 güen par niçh sa'acbe'i beṇə' de
 que leczə cheyalə' so'one' ca'. Na'
 catə' əgwsed əgwlo'ido' beṇə',
 cheyalə' əgwsed əgwlo'iga'acdo'one'
 porzə de'e güen na' əgwsed
 əgwlo'iga'acdo'one' binlo par
 niçh əsa'ape' le' respet. ⁸Na' bsed
 blo'iga'aque'ne' dižə' li par niçh
 notono gaquə əṇe' de que xtižə'onə'
 naquən mal. Gono' ca' par niçh
 beṇə' contr çhecho ca' yesyə'əto'ine'
 na' bito gaquə yesə'əneche' contr
 chio'o.

⁹Ben mendad de que mos ca'
 yosə'əzəxjw yichjga'aque' par
 yoso'ozenague' çhe xanga'aque'enə'
 na' so'one' bitə'ətezə de'e gon
 xanga'aquene' mendad sin cui
 yosyo'oži' yosyo'olebe' xtižə'enə'.
¹⁰Ben mendad cui yesə'əque'e bi
 de'e de çhe xanga'aque'enə', sino
 n̄itə'ətezə n̄ite'e so'one' can' cheyalə'
 so'one'. Bitə'ətezə de'e so'one'
 cheyalə' so'one'en güen par niçh
 əsa'acbe'i beṇə' yoblə de que de'en
 chsed chlo'icho çhe Diozən' naquən
 de'e güen, Dioz ben' babebej chio'o
 xni'a de'e malən'.

¹¹Diozən' bablo'e de que
 n̄ži'ililažə'e chio'o beṇəçh na' nape'
 yelə' guac par yebeje' chio'o xni'a
 de'e malən'. ¹²De'e na'anə' nezecho
 de que cheyalə' cuejyichjcho
 yoguə' de'en chso'on beṇə' mal ca'
 de'en chzelažə' la'ažda'omalchon'
 goncho na' bitə'ətezəchlə de'en
 cui chazlažə' Diozən'. Na' nezecho
 naquən' cheyalə' so cuezcho yežlyo
 nga, cheyalə' n̄abia' cuincho par
 goncho can' chazlažə' Diozən',
 cheyalə' goncho de'e güen, na'

cheyalə' əgwzenagcho che Diozən'.
¹³Na' zocho mbalaz de'en nezecho
 əžin ža yidə Jesocristən' de'e yoblə
 nse'e yelə' bala'an xen che'enə'.
 Jesocristən' naque' Dios checho,
 naque' le'ezelaogüe beṇə' zaque'e,
 na' babebeje' chio'o xni'a de'e
 malən'. ¹⁴Bnežjw cuine' gwso'ot
 beṇə' le' par gwdixjue' xtolə'əchon'
 niçh bebeje' chio'o xni'a yoguə'
 de'e mal, na' bene' par niçh
 la'ažda'ochon' naquən xi'ilažə'.
 Bene' de'e ca' par niçh naccho xi'in
 Diozən', na' par niçh chebeicho
 choncho de'e güennə'.

¹⁵Le' Tito, be' dižə' che de'en
 babzejni'ida' le', gwneyoi beṇə'
 par yoso'ozenague' chei, na'
 be'lega'aque' consejw par niçh
 yesə'əbejyichje' de'e malən', chedə'
 la' Diozən' bagwleje' le' par gono'
 de'e ca'. Bito go'o latjə yesə'əzo
 beṇə' le' ca'alə' cui yoso'ozenague'
 chio'.

**De'en cheyalə' gon chio'o
 chonjilažə'əcho Jesocristən'**

3 Ben par niçh žjəsə'əza'alaz'e'e
 de que cheyalə' yoso'ozexjw
 yichjga'aque' yoso'ozenague' che
 jostis ca' na' che beṇə' gwnabia'
 chega'aque' ca', na' cheyalə' nite'e
 probnid par so'one' bitə'ətezə
 de'e güen de'e so'one' mendad.
²Gožga'aque' de que bito yesə'əne'
 mal che notə'ətezə beṇə', na' bito
 yesə'ədiłə yesə'əšaše' len beṇə'
 yoblə. Cheyalə' əsa'aque' gaxjwlažə'
 na' cheyalə' əsa'ape' yelə'
 chxenlažə' len yoguə'əlol beṇə'.

³Antslən' gwçhol
 yichjla'ažda'ochon', na' goccho
 beṇə' godenag. Gwxoayagcho len

de'e malən' na' gwzochə xni'a
 la'ažda'omalchon' ca naquən'
 bencho bitə'ətezən' gwzelažə'ən
 na' bitə'ətezən' gwnan parzə
 niçh gwdacho legr. Con gwdacho
 bencho mal len beṇə' na' gocxi'i
 ljuežjcho. Besə'əgue'i beṇə' chio'o
 na' bgue'iga'aquechone'. ⁴Pero
 na' bžin ža catə' Diozən' ben'
 babebej chio'o xni'a de'e malən'
 blo'ine' chio'o ca beṇə' güennə'
 naque' na' catequən' chaquene'
 che chio'o beṇəch. ⁵Na' baltezcho
 chonjilažə'əcho Jesocristən',
 Diozən' bebeje' chio'o xni'a de'e
 malən' chedə' cheyašə' cheži'ilaž'e'e
 chio'o. Bito bebeje' chio'o por ni
 che bilə de'e güen de'e bencho.
 Beya'a beyibe' yichjla'ažda'ochon'
 na' bene' par niçh Spirit che'enə'
 bocobən len. ⁶Diozən' bsele'e
 Spiritən' zon lo'o yichjla'ažda'ochon'
 par chaclenchguan chio'o chedə'
 Jesocristən' babebeje' chio'o
 xni'a de'e malən'. ⁷De'en cheyašə'
 cheži'ilažə' Diozən' chio'o
 bsele'e Spirit che'enə' zon lo'o
 la'ažda'ochon' par niçh gaquə əne'
 checho de que naccho beṇə' güen
 laogüe'enə'. Na' leczə bsele'en par
 niçh nezecho žjəyecho len le'
 zejlicane.

⁸De'e ca' bagwnia' nga
 zjənaquən de'e li. Na' che'enda'
 sotezə so' chixjui'o de que de'e
 ca' babzejni'ida' le' zjənaquən
 de'e žialao xen gwzenagcho
 chei. Gono' ca' par niçh yoguə'
 beṇə' ca' chso'onjilažə' Diozən'
 nitə'ətezə nite'e so'one' de'e güen.
 De'e ca' bagwnia' zjənaquən de'e
 güen na' sa'aclenən notə'ətezə
 beṇə' yoso'ozenag chei. ⁹Pero

na' bito gwzenago' che beṇə' ca' zjənc̄hoł yichjla'ažda'oga'aque'enə' na' chesə'ədiłə chesə'əšaše' por ni che bizə dižə'. Na' bito cue' yichjo' che dia che de'e xaxta'oto' ca'. Bito gwzenago' che beṇə' ca' chsa'acyožə na' chesə'ədiłə chesə'əšaše' por ni che can' chse'ejni'ine' to to pont dao' che lei de'en bzoj de'e Moisezən'. Dižə' ca' zjənac ca' bito chaclenən beṇə' na' bitobi zaquə'ən.

¹⁰Be' consejw che notə'ətezə beṇə' chsed chlo'ine' xtižə' Diozən' clelə beṇə' chene'e yesə'ənao beṇə' de'en chzejni'ine'. Šə babi'one' consejw to čop las na' cui chzenague', bebeje' ca'alə. ¹¹De'en bito bzenague' chio' nachən' nezdə' naljene'. Na' de'e malən' chone' chlo'en de que nape' dolə'.

De'en chon Pabən' mendad gon Titon'

¹²Catə' əselə'a Artemasən' o Tiquicon' gan' zo', yob yidəšgo' par yežagcho syoda Nicopolisən',

chedə' bagwčhoglaža'a yega'ana' Nicopolisən' lao tyemp zaguən'. ¹³Ben xte ga zelao saquə'ədo' par gaquəleno' Zenas ben' babsed lein' gačjw gwche' na' Apolosn' catə' yesa'aque' gan' zo' par nič bitobi yesə'əyažjene' tnezən'. ¹⁴Na' bzejni'išguei beṇə' ljuežjcho ca' chso'onlilažə' Diozən' par nič yesə'əbe' yichjga'aque' porzə par so'one' de'e güen. Cheyalə' sa'aclen ljuežjga'aque' šə de bi de'en chesə'əyažje to toga'aque', na' cheyalə' so'one' con can' chazlažə' Diozən'.

Beṇə' ca' nitə'əlen Pabən' chesə'əguape' Titon' diox

¹⁵Yoguə' beṇə' ca' chso'on xšin Diozən' txen len nada' nga chesə'əguape' le' diox. Na' beṇə' ca' zoleno' txen beṇə' ca' chsa'aque checho chedə' chonlilažə'əcho Diozən' əgguapšgaga'aco'one' diox.

Gaquəlenšga Diozən' yoguə'əle. De'e na'azən' chzoja' na'a. Pab